

Pressiteedüs 9. okt 2017

## Uma Pido alostas matkasarja ni kuurõ kirjapandmisega pidolõ

Tulõval aastagal tulõ järjekõrran joba viies võrokeeline Uma Pido, miä vii kõik suuvja' pidolainõlõ matkasarjaga, millega kääütäs egän Vana-Võromaa katsast kihlkunnast ni Setomaal. Valla om no' ka kuurõ kirjapandminõ pidolõ.

**Uma Pido matkasari kand nimme „Määne om seo maa? Kaemi' perrä!“.** Edimäne matk om 15. oktoobril kell 11 Räpinä kihlkunnan Meenikunnon ni kand nimme „Mõtsavele' Palomaal“. Tulihengeline mõtsamiis Tiganiku Kaarel kõnõlõs matkaliisilõ mõtsaveljost ni hobõsõvargist, tõrvapalotamisõst ja vaigu korjamisõst.

Matkasarjast om lubanu võrksalt ossa võtta kiränik ja teküs as'aarmastaja sportlanõ Contra Urvastõst, kiä just lõpõt' Läti kiränigu Eduards Veidenbaumsi aus ja mälestüses juustu 170 km pikä tiikunna Tartost Lätimaalõ Kaläçihe. Contra lupas, et edimätses Uma Pido matkas om tä perän väikut praavumist jälleki vormin ni plaanitsõs matkaliisi rõõmusta' mõnõ põnõva luu ja vöi-olla ka mõnõ luulõtusõga. Niisamatõ härgütäs suur matkasõbõr Contra kõik matkust ossa võtma: „Ajagõ õks hinnäst kotost vällä, õnnõ tugitoolispordiga hinnäst vormin ei hoia!“

Edimädse matka alostus om Nohipalon, Valgõjärve parklan. Raä pikküs om 10 km ni plaanitu lõpuaig kell 15. Rada lätt müüdä teid, mõtsarato ja mõtsa. Rajakaarti saa nätä' alostusõn ja matkajuhtõ käest raä pääl. Poolõ matka pääl ja matka lõpun pakutas osaliisilõ lämmind tsäivett. Tähelepano: mõtsa all vöi paiguldõ likõ olla! Lisateedüst saa matkakõrraldaja Tõemäe Maive käest telefonil 5246871.

Matko kõrraldata utistüüh mitmidõ Võro ja Põlva maakunna inemiisi ja ütistüisigä. „Matkaplaanõ peeti joba kevjä ja täpsembäs minti suvõ lõpun, kon kõrralduskuunolõkil istsõ lavva takan pia 20 matkakõrraldajat ja ütenuõtlõjat,“ ütäl' Uma Pido projektijuht Tigasõ Merike.

Matku kottalõ saa teedüst mano järgmäidsi aadresse päält: [umapido.ee/matk](http://umapido.ee/matk) ni [facebook.com/umapido](https://www.facebook.com/umapido). Tulõvaisi matko toimumisao' ni -kotussõ' omma' kah pressitiidüse all är' tuud.

Samal aol, ku Uma Pido sõbra' hinnäst pido poolõ matkatõn minemä säädvä', saava' tuudsamma lauldõn tetä' ka koorilaulja', **selle et valla om lännü' kuurõ kirjapandminõ pidolõ**. Pidlõ oodõtas laulma mudilaisi-, latsi-, poiskõisi-, naisi-, mihi- ja segäkuurõ Lõuna-Eesti maakundõst, koh kõüdüs võro keele ni kultuuriga olõmah. No omma' oodõtu ka kõik koori', kiä laulu' ärä opva' ni võro keelest ja meelest üteh lõunaestläisigä rõõmu tahtva' tunda. „Ka seoõrd saava' pido ütiskuurõ hulka lava pääle laulma tulla' kunnakoori', miä pandas kokko pere-, sõprus-, ja muiõst kogokundõst. Oodami' ka ti registriimisi! Nõudmisõs om kunnakoori liikmidõ viispidämine ni nooti tundva juhõndaja,“ selet' koorijuht ni muusigatoimkunna liigõ Otsari Silja. Kirjapandmisõ kottalõ saa inämb lukõ aadressilt [http://umapido.ee/images/failid/2017\\_5\\_v.pdf](http://umapido.ee/images/failid/2017_5_v.pdf).

Uma Pido om võrokõisi kingitüs 100-aastaga vanotsõlõ Eesti Vabariigilõ. Samal aol tähistedäs ka võrokõisi Uma Pido väikut juubõlit. Pido om seokõrd pühendedü Võromaa vanavanõmbilõ. Sedäkõrda valisi rahvas pido laulu' vällä avaligul internetihääletusel – üteh ummi lemmiklaulõ hõisatõn tähistämi' nii Eesti Vabariigi suurt ku Uma Pido väikut juubõlit.

Pressitiidüse and' edesi: Silmä Sandri, Uma Pido kommunikatsioonijuht, tel 566 212 85, e-post [sander.silm@gmail.com](mailto:sander.silm@gmail.com)

Lähemb teedüs: Merike Tigas, Uma Pido projektijuht, tel 5340 5804, e-post [merike.tigas@wi.ee](mailto:merike.tigas@wi.ee)

### **Järgmäidsi matko toimumisao' ni –kotussõ':**

29.10.2017. kell 11 matk Võromaa-Setomaa piiri pääl, kon käüdas Võromaa-Setomaa piiri pääl Miikse uja veerel. Algus ni lõpp Vahtsõliina kandsi man.

11.11.2017 kell 11 matk Urvastõ kihlkunnan. Naatas pääle Urvastõ keriko mant, käüdas Pokumaal, Tammõ-Lauri tammõ man ja Urvastõ külän.

2.12.2017 kell 11 matk Põlva kihlkunnan Taivaskual.

17.03.2018 kell 11 matk Karula kihlkunnan, kon otsitas Lüllemäe kandin Jaan Lattiku ratu.

31.03.2018 kell 11 matk Kanõpi kihlkunnan, kon liigutas Koorastõn ümber kuvvõ Koorastõ järve.

14.04.2018 kell 11 matk Harglõ kihlkunnan, kon otsitas Koiva kundõ pääl "viendät aastaaigu".

28.04.2018 kell 11 matk Vahtsõliina kihlkunnan Piusa ja Tudõrna kandin.

12.05.2018 kell 11 matk Rõugõ kihlkunnan Paganamaal vanakur'a teie pääl.

2.06.2018 kell 11 matk Põlva ja Rõugõ kihlkunna piiri pääl, kon käüdas Võro liinan, uuritas Piiri uulitsat, kost lätt Põlva ja Rõugõ kihlkunna piir.